

II.

ՄԱՐԴԱՐԱՆԱԿԱՆ ՏԵՂԵԿՈՒԹԻՒՆՆԵՐ

Բոշան մանկութիւնից ի վեր չարքաշ կեանք է վարում և դրա համար էլ առողջակազմ է: Ոչ մի պակասաւոր անդամով — կոյր, խուլ կամ համր գրեթէ չէ կարելի գտնել նրանց մէջ. զառամութեան հասած ծերը կամ պառաւն իսկ սրատես է, սրալուր և առոյգ: Քայլում են ուղղաձիգ: Թէև մաքրութեան վրայ երբէք հոգ չեն տանում, օրինակ երես լուանալ կանոնաւորապէս չունին, բայց հիւանդութիւն նրանց մէջ սակաւ է: Մանուկները փոքրութիւնից վարժւում են տաքի, ցրտի, կիսամերկութեան, ծուխի, ամէն տեսակ զրկանքի. թույլերը ընկճվում մեռնում են այդ տեսակ կեանքի մէջ և ուժեղները ապրում. կատարւում է մի տեսակ ընտրականութիւն (sélection) և բոշա ժողովուրդը կազմւում է առողջ, ուժեղ և դիմացկուն անդամներից: Շատ ծնողներ մանուկներին ֆիզիքական կրթութիւն են տալիս՝ ձմեռը կիսամերկ գլորելով ձիւնի մէջ և ամառը ման ածելով կիզիչ արևի տակ. սառը ջրով լողացնելը մի ամենագործածական սովորութիւն է. մանուկին ոչ հազցնում են և ոչ էլ ոտքը գուլպայում. բոշա մանուկը գրեթէ միշտ ոտաբոբիկ է և գլխաբաց թէ ամառ և թէ ձմեռ:

Այդպիսի կեանքը բոշայի մորթուն տուել է մի տեսակ գեղնաւուն սև գոյն. մազերը սև են և խանձուած, անդամները ջղուտ և ամուր:

Բոշա տղամարդը առհասարակ միջահասակ է կան կարճեր էլ: Նրա գէմքը ձուածե է, ճակատը նեղ և ետ փախ-

չող, մուկ թը մեծ և բաւական դուրս ցցուած, աչքերը սև, երբեմն գորշ և կապույտ. կոպերի մէջ տեղի տարածութիւնը նեղ: Ընդհանրապէս նրա դէմքի գծագրութիւնը կոպիտ չէ. մազ չէ թողնում և մորուքը կըր ձևով կարճ ու կտրած է:

Բոշա կինը առհասարակ համակրելի գծագրութիւն ունի. երիտասարդները գեղեցիկ են և երբեմն այնպիսի կրակոտ, արտայայտիչ աչքերով ու գիրգ թշերով, որ կարելի է համարձակ կերպով նրանց եզակի գեղեցկուհիներ անուանել: Սակայն պառաւներն իսկ անախորժ տգեղութիւն չեն ունենում: Պառաւների աչքերն անգամ սուր են և արտայայտիչ:

Բոշա տղամարդի գանգի ձևը ընդհանրապէս կըրագլուխ է (bracicéphale). բայց գանգի չափը (indice céphalique) ներկայացնում է 77,40, որի հիման վրայ կարելի է դասել նրան, ըստ մարդաբանական լեզուի՝ մէզատուէֆալների կարգում (mesatocéphale):

Բոշան առհասարակ սաստիկ սրատես է և սրալուր, իսկ ձայնը՝ տղամարդկանցը մեղմ է, ախորժալուր և թափառող կանանցը՝ սուր ու ճշացող: Տղամարդիկ խօսում են հանդարտ, ցած ձայնով և ծանր. կանայք ընդհակառակն արագ, վրայ տալով և երբեք չեն վարանում ու կանգ առնում. շուարել ասած բանը նրանք չգիտեն. «խօսքը ջէբն ունին» ասում է նրանց մասին շրջապատող հասարակութիւնը:

Կինը հայ բոշաների մէջ մեծ դեր է խաղում. նա է տան աշխատաւորը թէ ներսում և թէ դրսում. տղամարդը միայն գործաւոր է, որ օրը մինչև երեկոյ կամ նստած մտղ է գործում և կամ ծխում է և խօսում. դրա համար էլ նա համեմատաբար դանդաղ է, ծանրաշարժ, մինչև իսկ ծոյլ: Իսկ կինը անդադար շարժվում է, անընդհատ գործում. ոչ մի բոպէ նրա ձայնը չէ լռում, ոչ մի բոպէ նա հանգստանալ չգիտէ: Միշտ արագաշարժ, ճարպիկ, խօսուն, սրամիտ և աշխույժ է բոշա կինը որպէս դրսում, այնպէս և տան մէջ: Եւ նկատելի է, որ բոշա կինը շատ աւելի լաւ, վայելուչ ու երկար հասակ ունի քան բոշա տղամարդը, որ կըր-

կուած է, վախկոտ ու զգուշաւոր: Բոշա կիներն է, որ ցուպը ձեռքին խմբի առաջն է գնում, արգելքները տապալում և պէտք եղած ժամանակ իր ահելի մահակով առիւծի պէս կռւում: Ֆիզիքական, կազմուածքի ոյժի կողմից կիներ շատ աւելի բարձր է. նոյնն է և մտաւորականում. բոշա տղամարդը դանդաղամիտ էլ է, մանաւանդ երբ հասակն առնում է. իսկ բոշա կիներ զառամած հասակումն իսկ սրամիտ է և ընդունակ: Նա իսկոյն ըմբռնում է, ունի սուր հոտառութիւն, գիտէ արագ վճռականութեամբ օգտուել հանգամանքներից, կարկեցնելու չափ յարմար պատասխաններ տալ, զարմանալի մանրակրկիտութեամբ չմոռանալ ո՛չ մի մանրամասնութիւն թէ տնտեսական գործերում և թէ օտարների հետ ունեցած յարաբերութեանց մէջ: Նա ոչնչից չէ վախենում, չէ քաշւում, ոչնչի առաջ կանգ չէ առնում. չունի ո՛չ մի սնոտիապաշտութիւն, ո՛չ մի նախապաշարմունք, բայց և հեռատես է և զգուշաւոր՝ երբ խնդիրը իր շահերին է վերաբերում *):

Բոշա կիներ իր վսեմ համարձակութեամբ, վարքի անբիծ մաքրութեամբ և օջախի պատիւը բարձր պահելու գիւցազնական ոգովը յիշեցնում է հռովմայեցի կանանց: Հասակը, կազմուածքի վայելչութիւնը և գեղեցկութիւնը կոնտրաստ է կազմում բոշա տղամարդու արտաքինի հետ: Եւ բոշա կիներ մարդաբանական նկարագրութիւնով էլ զանազանւում է բոշա տղամարդուց: Նրա գանգի չափն է 80: Իէժքը պակաս ձուածե է, ճակատը աւելի ուղիղ և մռութը ո՛չ այնքան դուրս ցցուած: Նա սու-բրախիսէֆալ է (sous brachépalé):

*) Բոշաների տիպեր լուսանկարելիս մեզ լաճախ պատահեց, որ բոշա տղամարդը խուսափում էր հանուելուց, մինչ բոշա կիներ համարձակ թողնում էր նկարելու, մանաւանդ եթէ վարձի ձայն էր լսում: Մի բոշա կնոջ պատկեր պատրաստուում էի հանելու և նա կանգնել էր, երբ ամուսինը ներսից վախեցած ու գոռալով դուրս թռաւ և կնոջը ներս կանչեց ու դուռը փակեց մեզ վրայ: